

四庫全書

集部

欽定四庫全書

御定佩文齋詠物詩選卷一百七

泉類

五言古

太平寺泉眼

唐杜甫

招提憑高岡疎散連草莽
出泉枯柳根汲引歲月古
石間見海眼天畔縈水府
廣深丈尺間宴息敢輕侮
青白二小蛇幽姿可時覩
如絲氣或上爛熳為雲雨
山頭到

山下鑿井不盡土取供十方僧香美勝牛乳北風起寒
文弱藻舒翠縷明涵客衣淨細蕩林影趣何當宅下流
餘潤通藥圃三春濕黃精一食生毛羽

幽谷泉

宋 歐陽脩

踏石弄泉流尋源入幽谷泉傍野人家四面深篁竹溉
稻滿春疇鳴渠繞茅屋生長飲甘泉陰泉栽美木潺湲
無春冬日夜響山曲自言今白首未慣逢朱轂顧我應
可怪每來聽不足

天門泉

宋梅堯臣

泠泠雲外泉的的巖光入靜若仙鑑開寒疑玉龍蟄時
應下鹿羣跡印青苔濕

廉泉

宋蘇軾

水性故自清不清或撓之君看此廉泉五色爛摩尼廉
者謂我廉何以此名為有廉則有貪有慧則有癡誰為
柳宗元誰為吳隱之漁父足豈潔許由耳何淄紛然立
名字此水了不知毀譽有時盡不知無盡時竭來廉泉

上捋鬚看鬢眉好在水中人到處相娛嬉

松下泉

元周權

長松蔭層巒黛色入崖骨鬱為翠雪浮蒸滃香不歇融
液作寒泉飛迸出石窟不濯輒紅塵空山瀉明月

鉛山龍泉

明劉基

茲山近南服勝迹冠朱方石骨入海眼地脉通混茫金
精孕清淑水德融嘉祥寒含六月冰潤浹九里長鯨顯
狎獵起虎口呿呀張發竇既窈窕流渠遂汪洋洞徹瑩

玉鑑鏘鳴合宮商靜含玄機妙動見大智藏養德君子
類膏物農夫望野僧向我言其功殊非常飲之祛百邪
能使俗慮忘漱嚥入靈府喉舌生清香爽浙動毛髮飄
忽凌風翔何當揚湛冽盡洗貪濁腸

秋泉

明 蔡羽

予愛秋泉清况傍巖花滴魚游日光中倒見潭上壁安
得無機人同坐相浣滌白朮朝露香紫芝秋霞熟石上
瓊瑤花採來不盈掬道人開石門悠然在深竹

七言古

虎跑泉

宋蘇軾

亭亭石塔東峰上，此老初來百神仰。
虎移泉眼趁行脚，龍作浪花供撫掌。
至今遊人灌濯罷，卧聽空階環玦響。
故知此老如此泉，莫作人間去來想。

醉中下瞿唐峽中流觀石壁飛泉

宋陸游

吾舟十丈如青蛟，乘風翔舞從天下。
江流觸地白鹽動，

灑灑浮波真一馬主人滿酌白玉杯
旗下畫鼓如春雷
回頭已失灤西市奇哉一削千仞之蒼崖
蒼崖中裂銀河飛空裏萬斛傾珠璣
醉面正湏迎亂點京塵未許化征衣

夫子泉

宋王十朋

君不見水經品第天下水康王谷中泉第一
但知取水不取人品第未容無得失
又不見武昌山中清冷淵名因人重逢蘇仙
至今人呼作菩薩淪入異教非吾泉刺

桐城中泮宮裏大成殿下新泉水不涸更以品第論混

混源流自夫子諸生游泳芹藻間日飲一瓢心慕顏聰

明不數遠公社

廬山蓮社有聰明泉

清白大勝卧龍山

越州卧龍山下有清

白泉范文正公名

聖毓尼丘家闕里泉脉何為今在是周流天

下皆羨泉浚井得之泉更羨我來酌泉仍叩頭遐想洙泗三千游世間何處有此水此州不愧名泉州

遊趵突泉

明王弼

濟南歷下多白泉白沙幾處涵風煙郭西趵突更神異

平地一朶白玉蓮浪花滾起千層雪此中疑是蛟龍穴
靈藏歲久變妖怪精氣上湧成涎沫餘波散漫淵復渟
谿風冷冽山雨青微霜初下鴈秋浴落月漸低猿夜聽
窮源我欲溯川陸舊誌虛傳自王屋冥茫難測造化情
聊寄泉亭漱寒玉

五言律

題山中流泉

唐 儲光羲

山中有流水借問不知名映地為天色飛空作雨聲轉

米深澗滿分出小池平恬淡無人見年年常自清

和靈一上人新泉

唐劉長卿

東林一泉出復與遠公期石淺寒流處山空夜落時
夢閒聞細響慮澹對清漪動靜皆無意惟應達者知

和崔會稽詠王兵曹廳前湧泉勢成中字

唐包融

茂德來徵應流泉入詠歌含靈符上善作字表中
有草恒垂露無風欲偃波為看人共水清白定誰多

一公新泉

唐嚴維

山下新泉出泠泠此發源落池纔有響清石未成痕獨
映孤松色殊分衆鳥喧惟當清夜月對此啓禪門

題青蘿翁雙泉

唐耿漳

側弁向清漪門中夕照移異源生暗石疊響落秋池葉
擁沙痕沒流回草蔓隨泠泠無限意不獨遠公知

山下泉

唐李端

碧水映丹霞濺濺露淺沙暗通山下草流出洞中花素

色和雲落喧聲繞石斜明朝更尋去應到阮郎家

聽夜泉

唐張籍

細泉深處落夜久漸聞聲獨起出門聽欲尋當澗行還
疑隔林遠復畏有風生月下長來此無人亦到明

題噴玉泉

唐白居易

泉噴聲如玉潭澄色似空練垂青嶂上珠瀉綠盆中溜
滴三秋雨寒生六月風何時此巖下來作濯纓翁

題僧院引泉

唐姚合

泉眼高千尺山僧取得歸
架空橫竹引鑿石透渠飛
洗藥谿流濁澆花雨力微
朝昏長繞看護惜似持衣

方山寺松下泉

唐章孝標

石脉綻寒光松根噴曉霜
注瓶雲母滑漱齒茯苓香
野客偷煎茗山僧惜淨牀
三禪不要問孤月在中央

酬從叔聽夜泉見寄

唐項斯

夢罷更開戶寒泉聲隔雲
共誰尋最遠獨自坐偏聞
巖際和風滴谿中浸月分
豈知當此夜流念到江濱

聽夜泉

唐 劉得仁

靜裏層層石潺潺到鶴林迴流出幾洞源遠歷千岑寒
助空山月清兼此夜心幽人聽達曙難罷薛林吟

題東林寺虎跑泉

唐 周 繇

勝到通幽感靈泉有虎跑爪擡山脉斷掌托石心坳竹
靄疑相近松陰蓋亦交轉令栖遁者真境愈難拋

野泉

唐 張 蠟

遠出白雲中長年聽不窮細聲縈亂石寒色入長空挂

辟聊成雨穿林別起風溫泉非爾類源發在深宮

題鶴鳴泉

唐曹松

仙鶴曾鳴處泉兼半井苔直峯拋影入片月瀉光來激
灑侵顏冷深沈慰眼開何因值丹頂滿汲石瓶迴

信州開通寺題僧砌下泉

曹松

細聲從嶠落幽淡浸香墀此境未開日何人初見時耗
痕延黑蘚靜罅吐微澌應有松梢鶴下來當飲之

商山夜聞泉

曹松

瀉月聲不斷坐來心益閒無人知落處萬木冷空山遠
憶雲容外幽疑石縫間那辭通曙聽明日度藍關

泉

唐李中

潺潺青嶂底來處一何長激石苔痕滑侵松鶴夢涼泛
花穿竹塢瀉月下蓮塘想得歸何處天涯助渺茫

遙賦義興潛泉

李中

見說靈泉好潺湲興莫窮誰當秋霽後獨聽月明中澗
石苔花潤隨流木葉紅何當化霖雨濟物顯殊功

井泉

宋 劉子翬

石井水濺濺寒莎映碧鮮
雨聲添溜急天影入波圓
曉汲連山寺春耕潤野田
杖藜三嚙罷毛髮更蕭然

題周仲傑古泉

元 朱德潤

聞說東園好漸江暗發源
鑿池疏地脉疊石種雲根
滌硯魚鱗動烹茶蟹眼溫
欲知隱者樂何日扣柴門

玉泉

明 何景明

行遊金口寺坐愛玉泉名
雲去隨龍女風來動石鯨
入

宮朝太液穿苑象昆明却望天河水迢迢萬古情

酌巖泉

明黃輝

石髓從君剖何如玉乳香頷珠光直射膽鏡影橫張甘露霏龍沫寒星散鵲漿一杯和笑酌分得道人糧

五言排律

甘泉詩

唐耿漳

異井甘如醴深仁遠未涯氣寒堪破暑源靜自蠲邪脩綆懸冰甃新桐蔭玉沙帶星凝曉露拂霧擁秋華綠溢

涵千仞清泠飲萬家何能葛洪宅終日閑煙霞

七言律

經漢武泉

唐趙嘏

芙蓉池苑起清秋漢武泉聲落御溝他日江山映蓬鬢
二年楊柳別漁舟行間駐馬題詩去物外何人識醉遊
盡把歸心付紅葉晚來隨水向東流

石門山泉

唐鄭谷

一脈清泠何所之縈莎激蘚入僧池雲邊野客窮來處

石上寒猿見落時聚沫繞槎殘雪在迸流穿樹墮花隨
煙春雨晚閒吟去不復遠尋皇子陂

和陳洗馬山莊新泉

宋 徐鉉

已開山館待抽簪更鑿巖泉欲洗心常被松聲迷細韻
忽流花片落高岑便疏淺瀨穿莎徑始有清光映竹林
何日煎茶醞香酒沙邊同聽暝猿吟

宿千歲菴聽泉

宋 劉克莊

因愛菴前一脉泉襟袞來此借房眠驟聞將謂谿當戶

久聽翻疑屋是船
變作怒聲猶壯偉
滴成細點更清圓
君看昔日蘭亭帖
亦把湍流替管絃

遊龍泉

金元好問

風色澄鮮稱野情
居僧聞客喜相迎
藤垂石磴雲添潤
泉漱山根玉有聲
庭樹老於臨濟寺
霜林渾是漢家營
明年此日知何處
莫惜題詩記姓名

題子明雪泉

元朱德潤

萬壑輕澌度薄寒
碧雲深處互漫漫
六花濺沫成天巧

一脉潛流激暮湍石鼎茶溫風味冽玉壺冰皎露華乾
荆谿白石天寒夜誤作山陰道上看

寶掌泉

元陳樵

屋上無端雨亂飄雨留石罅碧寥寥浮光出穴藏丹淺
浣水為花到地消石髮年深長滿洞玉魚春冷未生苗
泉中自是蛟龍窟頃刻陰雲滿樹腰

五言絕句

金屑泉

唐王維

日飲金屑泉少當千餘歲翠鳳翊文螭羽節朝玉帝

砌下泉

唐錢起

穿雲來自遠激砌流偏駛能資庭戶幽更引海禽至

山下泉

唐皇甫曾

漾漾帶山光澄澄倒林影那知石上喧却益山中靜

流泉

宋梅堯臣

石齒嚼寒聲粼粼縈曲處有時浮落英又向城根去

井泉

宋朱子

開山昔何人鑿此寒泉井
獨夜漱瓊瑤冷然發深省

玉簾泉

元趙孟頫

飛泉如玉簾直下數千尺
新月橫簾鈎遙遙挂空碧

玉簾泉

元袁桷

截玉作明簾不知簾外事
應有碧眼仙隔簾見人至

寒月泉

元杜本

齧冰激齒頰嚙雪滌胃腸
此水若寒月飲之年命長

羅漢泉

元迺賢

錫杖虛空落靈泉發地中忽看流菜葉始信石橋通

七言絕句

憶四明山泉

唐施肩吾

愛彼山中石泉水幽聲夜夜落空裏至今憶得卧雲時
猶是涓涓在人耳

洞靈觀流泉

唐李郢

石上苔蕪水上煙潺湲聲在觀門前千巖萬壑分流去
更引飛花入洞天

飲巖泉

唐
陸龜蒙

已甘茅洞三君食
欠買桐江一朵山
巖子瀨高秋浪白
水禽飛盡釣舟還

謝山泉

陸龜蒙

泱泱春泉出洞霞
石壘封寄野人家
草堂晝日留僧坐
自向前谿摘茗芽

庶子泉

宋
歐陽脩

庶子遺蹤畱此地
寒巖徙倚弄飛泉
古人不見心可見

一片清光長皎然

遊中峯杯泉

宋蘇軾

石眼杯泉舉世無
要知杯渡是凡夫
可憐狡獪維摩老
戲取江湖入鉢盂

白雲泉

宋范成大

龍頭高啄漱飛流
玉醴甘渾乳氣浮
捫腹煮泉烹鬪勝
真成騎鶴上揚州

虎丘新復古石井泉次太守沈虞卿韻

范成大

勸耕堂上醉高年，和氣春風共藹然。
大士亦脩隨喜供，夜來古井躍新泉。

其二

落紙雲煙墮翠巒，一泓潭月鬪清寒。
鳳池上揮毫手，却掬山泉淬筆端。

肩玉泉

宋王十朋

白石巖腰肩玉泉，佳名初自長官傳。
渾疑齒頰冰霜論。

終日霏霏落半天

御定佩文齋詠物詩選卷一百七

欽定四庫全書

御定佩文齋詠物詩選卷一百八

溫泉類

五言古

浴溫泉

北齊
劉逖

驪岫猶懷土
新豐尚有神
井堪消疹
溫泉足蕩邪
紫苔生石岸
黃沫擁金沙
振衣殊未已
翻能停使車

溫泉泉

宋
朱子

連山西南來中斷還崛起干霄幾千仞據地三百里飛
峰上靈秀衆壑下清美逮茲勢力窮猶能出奇偉誰燃
丹黃燄燹此玉池水客來爭解帶萬念付一洗當年謝
康樂絃絕今已矣水碧復流溫相思五湖裏

五言律

奉和聖製溫泉言志應制

唐張說

溫泉媚新豐驪山橫半空湯池薰水殿翠木暖煙宮起
疾逾山藥無私合聖功始知堯舜德心與萬人同

從駕遊溫泉宮

唐 徐安貞

神女調溫液年年待聖人
試開臨水殿來洗屬車塵
暖氣隨明主恩波洽近臣
靈威自無極從此獻千春

溫湯卽事

唐 皇甫冉

天仗星辰轉霜冬景氣和
樹含溫液潤山入繚垣多
丞相金錢賜平陽玉輦過
魯儒求一謁無路獨如何

五言排律

過溫泉

唐 高宗

溫渚停仙蹕豐郊駐曉旌路曲迴輪影巖虛傳漏聲暖
酒驚湍駛寒空碧霧輕林黃疎葉下野白曙霜明眺聽
良無已煙霞斷續生

幸鳳湯泉

唐明皇

西狩觀周俗南山歷漢宮薦鮮知路近省歛覺年豐陰
谷含神爨湯泉養聖功益齡仙井合愈疾醴源通不重
鳴岐鳳誰誇陳寶雄願將無限澤沾沐衆心同

奉和聖製幸鳳湯泉應制

唐張說

周狩聞岐禮秦都辨雍名獻禽天子孝存老聖皇情溫
潤宜冬幸遊畋樂歲成湯雲出水殿暖氣入山營坎意
無私潔乾心稱物平帝歌流樂府谿谷也增榮

奉和聖製過溫湯泉

唐 王德貞

握圖開萬寓屬聖啓千年驪阜疏緹騎驚鴻映彩旃玉
霜明鳳野金陣藻龍川祥煙聚危岫德水溢飛泉停輿
興睿覽還舉大風篇

和僕射晉公扈從溫泉

唐 王維

天子幸新豐旌旗渭水東
寒山天仗裏溫谷幔城中
奠玉羣仙座焚香太乙宮
出遊逢牧馬罷獵有非熊
上宰無為化明時太古同
靈芝三秀紫陳粟萬箱
紅王禮尊儒教天兵小
戰功謀猷歸哲匠詞賦屬文宗
司諫方無闕陳詩且未工
長吟吉甫頌朝夕仰清風

同崔員外溫泉即事

唐郭 汭

輦輅移雙闕宸遊整六師
天迴紫微座日轉羽林旗
霜氣寒戈戟軍容壯虎貔
弓鳴射鴈處泉暖躍龍時
惠化

成觀俗謳謠入賦詩同歡王道盛相與詠雍熙

七言律

駕幸溫泉

唐
盧象

傳聞聖主幸新豐清蹕鳴鑿出禁中細草終朝隨步輦
垂楊幾處繞行宮千官扈從驪山北萬國來朝渭水東
此日小臣徒獻賦漢家誰復重揚雄

安寧溫泉

明
楊慎

鏗瑟舞雩歌點也流觴脩禊記羲之何如碧玉溫泉水

絕勝華清碧石池已涸金膏分沉瀝更邀明月濯漣漪
沈沈蘭酌春相引汎汎楊舟晚更移

七言絕句

題廬山山下湯泉

唐

白居易

一眼湯泉流向東浸泥澆草暖無功驪山溫水因何事
流入金鋪玉甃中

湯泉

唐

陸龜蒙


暖殿流湯數十間玉渠香細浪回環上皇初解雲衣浴

珠棹時敲瑟瑟山

湯泉

宋
王十朋

占得乾坤造化爐地中沸出巧工夫
泉猶自作炎涼態
休說衆生垢有無



御定佩文齋詠物詩選卷一百八

欽定四庫全書

集部

御定佩文齋詠物詩選卷一百九至
十三

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣王 瓊

謄錄監生_臣趙位堂

欽定四庫全書

御定佩文齋詠物詩選卷一百九

瀑布類

附水簾

五言古

入廬山仰望瀑布

唐
張九齡

絕頂有懸泉
喧喧出煙杪
不知幾時歲
但見無昏曉
閃閃青崖落
鮮鮮白皎灑
流濕行雲濺
沫驚飛鳥雷
吼何噴薄箭
馳入窈窕吾
聞山下蒙
今乃林巒表
物情有

詭激坤元曷紛矯默然置此去變化誰能了

望廬山瀑布水

唐李白

西登香爐峰南見瀑布水挂流三百丈噴壑數十里歛
如飛電來隱若白虹起初驚河漢落半灑雲天裏仰觀
勢轉雄壯哉造化功海風吹不斷江月照還空空
中亂
潑射左右洗青壁飛珠散輕霰流沫沸穹石而我樂名
山對之心益閒無論漱瓊液且得洗塵顏仍諧夙所好
永願辭人間

簡寂觀西澗瀑布下作

唐
韋應物

淙流絕壁散虛煙翠澗深叢際松風起飄來灑塵襟窺
蘿玩猿鳥解組傲雲林茶果邀真侶觴酌洽同心曠歲
懷茲賞行春始重尋聊將橫吹曲一寫山水音

瀑布

唐
章孝標

秋河溢長空天灑萬丈布深雷隱雲壑孤電挂巖樹滄
溟曉噴雪碧落晴盪素非趨下流急勢使不得住

七言古

廬山瀑布謠

元 楊維禎

銀河忽如瓠子決瀉諸五老之峰前我疑天仙織素練
素練脫軸垂青天便欲手把并州剪剪取一幅玻瓈煙
相逢雲石子有似捉月仙酒喉無耐夜渴甚騎鯨吸海
枯桑田居然化作十萬丈玉虹倒挂清泠淵

五言律

湖口望廬山瀑布泉

唐 張九齡

萬丈紅泉落迢迢半紫氛奔飛下雜樹灑落出重雲日

照虹霓似天清風雨聞靈山多秀色空水共氤氳

廬山瀑布

唐
裴說

靜景憑高望光分翠嶂開嶮飛千尺雪寒撲一聲雷過
去雲衝斷傍來燒隔迴何當住峰下終歲絕塵埃

石門瀑布

宋
徐照

一派從天下曾經李白看千年流不盡六月地長寒灑
水跳微沫衝崖作怒湍人言深碧處常有老龍蟠

龍湫瀑布

徐照

飛下數千尺全然無定形電橫天日射龍出石雲腥壯
勢春曾看寒聲佛共聽昔人云此水洗目最能靈

題雙瀑

宋 王十朋

瀑水蕭峰下靈源不可尋倚天雙竇劍點石萬星金勢
合鯨鯢闐聲聯虎豹吟我來遊勝境洗耳聽清音

五言排律

秋霽望廬山瀑布

唐 夏侯楚

常思瀑布幽晴眺喜逢秋一帶連青嶂千尋倒碧流濕

雲應誤鶴翻浪定驚鷗星浦虹初下爐峰煙未收巖高
時裊裊天淨起悠悠儻見朝宗日還須濟巨舟

七言律

題仙巖瀑布呈陳明府

唐
方干

方知激蹙與噴飛直恐古今同一時遠壑流來多石脈
寒空撲碎作凌澌謝公巖上衝雲去織女星邊落地遲
聚向山前更誰測深沈見底是澄漪

東山瀑布

方干

遙夜看來宜月照，平明失去被雲迷。
挂巖遠勢穿松塢，擊石殘聲注稻畦。
素色噴成三伏雪，餘波流作萬年谿。
不緣真宰能開決，應向山前雜淤泥。

石門瀑布

方干

奔傾漱石亦噴苔，此事皆從元化來。
片影挂巖輕似練，遠聲離洞咽于雷。
氣含松桂千枝潤，勢畫雲霞一道開。
直是銀河分派落，兼聞碎滴濺天台。

天台瀑布

唐
曹松

萬仞得名云瀑布遠看如織挂天台休疑寶尺難量度
直恐金刀易剪裁噴向林梢成夏雪傾來石上作春雷
欲知便是銀河水墮落人間合却迴

開先瀑布

宋蘇轍

山上流泉自作谿行逢石缺瀉虹霓定知雲外波瀾濶
飛到峰前本末齊入海明河驚照曜倚天長劍失提攜
誰來卧枕莓苔石一洗塵心萬斛泥

括蒼石門瀑布

宋戴復古

少泊石門觀瀑布明知是水却疑非亂拋雪玉從天下
散作雲煙到地飛夜聽蕭蕭洗塵夢風吹細細濕人衣
謝公蠟屐經行處聞有留題在翠微

三巖瀑布

元 尹廷高

天然石室踞雲根上有飛泉勢若奔千尺素簾寒不卷
一潭碧玉碎無痕風飄餘濕沾香案月漏疎光射洞門
我欲捫蘿登絕頂桃花流水細窮源

瀑布

明 朱之蕃

萬峰迴合欲參天，千丈驚看匹練懸。
素女浣紗搖皓月，鮫人曳縞漾輕烟。
匡廬色借香花散，鴈宕聲隨鼓吹傳。
何必瑤京餐沆瀣，枕流終日聽潺湲。

七言排律

和尚書詠泉山瀑布十二韻

唐徐夔

名齊火浣溢山椒，誰把驚虹挂一條。
天外倚來秋水刃，海心飛上白龍綃。
民田鑿斷雲根引，僧圃穿通竹影澆。
噴石似煙輕漠漠，濺崖如雨冷瀟瀟。
冰中蠶緒纏蒼壁

日裏虹精挂絳霄，寒漱綠陰仙桂老。
碎流紅艷野桃天，千尋練寫長年在。
六出花開夏日消，急恐劃分青嶂骨。
久應綳裂翠微腰，濯纓便可譏漁父。
洗耳還宜傲帝堯，林際猿狖偏得飲。
岸邊烏鵲擬為橋，赤城未到詩先寄。
廬阜曾遊夢已遙，數夜積霖聲更遠。
郡樓歌枕聽良宵。

五言絕句

瀑布

唐

施肩吾

豁開青冥巔，瀉出萬丈泉。
如裁一條素，白日懸秋天。

聞瀑布冰折

唐
馬戴

萬仞冰峭折寒聲投白雲
先搖山月隨我向石牀
聞

瀑布

宋
朱子

巔崖出飛泉百尺散風雨
空質麗晴暉龍鸞共掀舞

小瀑布

在嚴谿釣臺之
東前對方灣

宋
王十朋

釣瀨雲山外巖花瀑布邊
却疑方處士詩思湧成泉

七言絕句

望廬山瀑布水

唐
李白

日照香爐生紫煙遙看瀑布掛長川
飛流直下三千尺疑是銀河落九天

次觀瀑布韻

宋朱子

快瀉蒼崖一道泉白龍飛下蔚藍天
山有此真奇觀倚杖來看思凜然

附水簾

七言律

水簾

唐羅鄴

亂泉飛下翠屏中似共真珠巧綴同一片長垂今與古
半山遙聽水兼風雖無舒卷隨人意自有潺湲濟物功
每向暑天來往見疑將仙子隔房櫳

七言絕句

水簾

唐
羅鄴

萬點飛泉下白雲似簾懸處望疑真若將此水為霖雨
更勝長垂隔路塵

御定佩文齋詠物詩選卷一百九

欽定四庫全書

御定佩文齋詠物詩選卷一百十

衆水類

五言古

太子泮落日望水

梁 劉孝綽

川平落日迴，落照滿川漲。
復此淪波地，派別引沮漳。
耿耿流長脈，熠熠動微光。
寒鳥逐查漾，飢鷄拂浪翔。
臨泛自多美，况乃還故鄉。
榜人夜理檝，櫂女闈成粧。
欲待春

江曙爭塗向洛陽

汴水早發應令

隋
虞世基

夏山朝萬國軒庭會百神成功疇與讓盛德今為鄰區
宇屬平一庶類仰陶鈞鑿蹕臨河濟裘冕肅柴裡啓行
分七萃備物象三辰祈祈巨原隰濟濟咸縉紳暘谷升
朝景青丘發早春袞衣敷帝則分葩叙彞倫臨淄成誦
美河間雅樂陳薰風穆已被茂實久愈新

過津口

唐
杜甫

南岳自茲近湘流東逝深和風引桂楫春日漲雲岑回
道過津口而多楓樹林白魚困密網黃鳥喧嘉音物微
限通塞惻隱仁者心甕餘不盡酒膝有無聲琴聖賢兩
寂寞渺渺獨開襟

與諸公遊濟瀆泛舟

唐李頎

濟水出王屋其源來不窮狀泉數眼沸平地清流通皇
帝崇祀典詔書視三公分官禱靈廟奠璧沈河宮神應
每如荅松篁氣蔥蘢蒼螭送飛雨赤鯉噴回風灑酒布

瑤席吹簫下玉童元冥掌陰事祝史告年豐百谷趨潭
底三光懸鏡中淺深露沙石蘋蓼生虛空晚景臨泛美
亭臯輕靄紅晴山傍舟楫白鷺驚絲桐我本家潁北出
門見維嵩焉知松峰外又有天壇東左手正接羅浩歌
眇青穹夷猶傲清吏偃仰狎漁翁對此川上閒非君誰
與同霜凝遠邨曙月淨蕙葭叢茲境信難遇為歡殊未
終淹留悵言別煙嶼夕微濛

渭水

唐

權德輿

呂氏年八十皤然持釣鉤意在靖天下豈惟食營丘師
臣有家法小白乃尊周日暮駐征策愛茲清渭流

遊湓水

唐
白居易

四月未全熱麥涼江風秋湖山處處好最愛湓水頭湓
水從東來一派入江流可憐似縈帶中有隨風舟命酒
一臨泛捨鞍揚棹謳放迴岸傍馬去逐波間鷗煙浪始
渺渺風襟亦悠悠初疑上河漢中若尋瀛洲汀樹綠拂
池沙草芳未休青蘿與紫葛枝蔓垂相縈繫纜步平岸

回頭望江州城雉映水見隱隱如蜃樓日入意未盡將
歸復少留到官行半歲今日方一遊此地來何暮可以
寫吾憂

晚渡伊水

唐
韋述

悠悠涉伊水伊水清見石是時春向深兩岸草如積迢
遞望洲嶼逶迤亘津陌新樹落疎紅遙原上新碧回首
望洛陽遠有長山隔煙霧猶辨家風塵已為客登陟多
異趣往來見行役雲起早已昏鳥飛日將夕光陰逝不

借超然慕疇昔遠遊亦何為歸來存竹帛

伊水門

唐樓穎

朝陟伊水門伊水入門流愜心乃成興澹然泛孤舟
霏微傍青靄容與隨白鷗竹陰交前浦柳花媚中洲
日落陰雲生彌覺茲路幽聊以恣所適此外知何求

苔雪二水

宋梅堯臣

昔愛伊與洛今逢苔與雪南郭復西城曉水明於甲
塵纓庶可濯白鳥誰來狎落日潭上歸漁歌自相答

吳江放船至楓橋灣

宋 薛季宣

短篷負長虹，破簾挂明月。
風馬坐中生，天幕波中出。
高城多隱映，遠岫纔羅列。
少小泛吳船，始識仙凡別。

汾水道中

元 王暉

蒼巔互出縮，峪勢曲走蛇。
回眺驚後擁，迎着復橫遮。
雲林蕩高秋，半嶺翻晴霞。
十里九渡水，清流帶寒沙。
山谿本幽寂，激之聲乃譁。
解鞍憩美蔭，覺我心靜嘉。
風枝滿秋實，野菊披水涯。
幽馨散蘭馥，紅鮮綴丹砂。
二物固瑣

碎托興騷人誇我欣記所見信筆書田家

釣魚灣

明 吳鼎芳

家住此灣中不出此灣裏長日坐魚磯閒心澹無已白
雲起前山悠悠亦來此搔首對斜陽綸竿久不理

早秋溼上行

明 王 問

茲晨暑氣平溼上自容與返照入柴扉蟬聲在高樹溼
水靜不流蘋花發西渡五湖秋色中欲乘扁舟去

五言律

侍宴瀝水賦得濃字

唐張說

千行發御柳一葉下仙茆青浦宸遊至朱城紫氣濃雲霞交暮色草樹喜春容藹藹天旗轉清笳入九重

侍宴瀝水賦得長字

唐宗楚客

御輦出明光乘流泛羽觴珠胎隨月減玉漏與年長寒盡梅猶白風遲柳未黃日斜旌旆轉休氣展林塘

泛前陂

唐王維

秋空自明迴况復遠人寰暢以沙際鶴蕪之雲外山澄

波淡將夕清月皎方閒此夜任孤棹夷猶殊未還

泊揚子津

唐祖詠

纔入維揚郡鄉關此路遙林藏初霽雨風退欲歸潮江
火明沙岸雲帆礙浦橋客衣今正薄寒氣昨來饒

與鄆縣羣官泛漢陂

唐岑參

萬頃浸天色千尋窮地根舟移城入樹岸濶水浮邨閒
鷺鷥蕭蕭管潛蚪傍酒樽暝來呼小吏列火儼歸軒

尋龍湫

唐孫逖

仙穴尋遺跡輕舟愛水鄉谿流一曲盡山路九峰長漁父歌金洞江妃舞翠房遙憐葛仙宅真氣共微茫

董嶺水

唐周朴

湖州安吉縣門與白雲齊禹力不到處河聲流向西去
衙山色遠近水月光低中有高人在沙中曳杖藜

臨石步港

宋徐鉉

碕岸隨縈帶微風起細漣綠陰三月後倒影亂峰前吹浪游鱗小粘苔碎石圓會將腰下組換取釣魚船

過白水

宋 梅堯臣

下馬獨懷古，倏然臨渡風。真人去未久，流水自無窮。雨濶沙痕漲，灣平野色通。曾興漢家業，今與百川同。

發揚港渡入交口夾

宋 楊萬里

朝雨息，息霽春山歷歷嘉。老青交幼綠，暗錦出明花。漁艇十數隻，雞聲三五家。人生須富貴，此輩亦生涯。

泊桐廬分水港

宋 王十朋

何處繫歸舟，桐廬舊日遊。港從分水出，亭瞰合江流。豐

嶂雲披絮遙天月吐鉤紛紛釣魚者無復見羊裘

大龍湫

宋 趙師秀

一派落虛空如何畫得同高風吹作雨低日射成虹西
域書曾說先朝路始通或言龍已去幽處別為宮

五言排律

賦得荆谿夜湍送蔣逸人歸義興山

唐 皇甫冉

驚湍流不極夜渡識雲岑長帶谿沙淺時因山雨深方

同七里路更遂五湖心
揭厲朝將夕潺湲古至今
花源若可許雖遠亦相尋

七言律

十五里沙

宋 劉克莊

只見如山白浪飛
更堪動地黑風吹
渺茫直際九州外
洶湧常如八月時
河伯豈能窮海若
靈胥僅可嚇吳兒
惜無散髮騎鯨友
共了南遊一段奇

太乙湫

金 楊雲翼

金匱要略卷一百十
四崖環抱鏡光平數畝澄泓石底渟寒入井頭千丈雪
淨涵巖際一天星傍人爭出魚依勢銜葉飛來鳥護靈
日日東風送潮出只因絕頂透滄溟

太液晴波

明
林環

池頭旭日散輕煙開鏡清光近九天翠柳條長經雨後
綠蘋香暖得春先御溝流出通金水仙派分來自玉泉
在錦幾回陪宴樂詠歌魚藻繼周篇

太液晴波

明
曾棨

靈沼溶溶淑氣回
玉泉初暖碧如苔
風迴鼇背山光動
日照龍鱗鏡影開
飛鳥慣隨仙仗過
遊魚偏識翠華來
願傾池水成春酒
添進南山萬壽杯

太液晴波

明梁潛

蓬島前頭太液池
搖風漾日動連漪
魚過已慣迎仙舫
鷗鷺應能識翠旗
著雨錦蕖開晚鏡
拂煙翠柳曳晴絲
周人自昔歌靈沼
願沐恩波一獻詩

五言絕句

東陂

唐錢起

永日興難忘，掇芳春陂曲。
新晴花枝下，愛此苔水綠。

潺湲聲

錢起

亂石跳素波，寒聲聞幾處。
颼颼暝風引，散出空林去。

黃菊灣

唐顧況

時菊凝曉露，露華滴秋灣。
仙人釀酒熟，醉裏飛空山。

白鷺汀

顧況

霍靡汀草碧，淋森鷺毛白。
夜起沙月中，思量捕魚策。

歌松漪

顧況

湛湛碧漣漪，老松歌側卧。悠揚綠蘿影，下拂波紋破。

春波曲

元楊維禎

家住春波上，春深未得歸。桃花新水漲，應沒浣花磯。

新水

明袁凱

柳外朝朝雨，平添過舊痕。往時桃葉渡，今日更銷魂。

七言絕句

渭上

唐溫庭筠

呂公榮達子陵歸萬古煙波遶釣磯橋上一通名利迹
至今江鳥背人飛

三十六灣

唐許渾

縹緲臨風思美人
荻花楓葉帶谿聲
夜深吹笛移船去
三十六灣秋月明

延平津

唐胡曾

延平津下水溶溶
峭壁巍峩一萬重
昨夜七星潭底見
分明神劍化為龍

寒蘆港

宋 蘇軾

溶溶晴港漾春暉
蘆筍生時柳絮飛
還有江南風物否
桃花流水鱖魚肥

新灣

宋 劉子翬

冉冉寒生水面煙
吳歌唱罷月微偏
停橈又向灣前宿
一夜西風浪打船

過臨平蓮蕩

宋 楊萬里

蓮蕩層層鏡樣方
春來嫩玉斬新黃
角頭一一張蘆箔

不遣魚蝦過別塘

其二

人家星散水中央
十里芹羹菰飯香
想得薰風端午後
荷花世界柳絲鄉

過沙頭

楊萬里

過了沙頭漸有邨
地平江濶氣清溫
暗潮已到無人會
只有篙師識水痕

玉淵

宋

王十朋

誰決銀河落半天飛流濺沫五峰前
山中草木皆光潤
知有含輝玉在淵

御定佩文齋詠物詩選卷一百十

欽定四庫全書

御定佩文齋詠物詩選卷一百十一

宮殿類

五言古

新成安樂宮

梁簡文帝

遙看雲霧中，刻桷映丹虹。
珠簾通曉日，金花拂夜風。
欲知歌管處，來過安樂宮。

新成安樂宮

陳陰鏗

新宮寶壯哉雲裏望樓臺迢遞翔鷗仰聯翩賀雀來重
檐寒霧宿丹井夏蓮開砌石披新錦梁花畫早梅欲知
安樂盛歌管雜塵埃

重陽殿成金石會竟上詩

陳

張正見

周王興路寢漢后成甘泉共知崇壯麗迢遞與雲連抗
殿疏龍首峻陞激天泉東西跨函谷左右矚伊瀍百常
飛觀竦三休複道懸拱烏遙造日擗虬遠架煙雲棟疑
飛雨風窓似望仙玉女臨芳鏡金璫映彩椽梅梁橫發

蕊藻井倒披蓮榮光開御宿佳氣屬祈年霜鴈排空斷
寒花映日鮮負宸憑霄極台司列象躔登臺喧大夏御
氣響鈞天北斗承三獻南風入五絃鸞歌鷓鴣右獸舞
射熊前翔鷲仰不逮燕雀徒聯翩

過舊宮

北周明帝

玉燭調秋氣金輿歷舊宮還如過白水更似入新豐秋
潭清晚菊寒井落疎桐舉杯延故老令聞歌大風

侍宴瑤泉殿

陳江總

水亭通粉詣石路接堂皇
野花不識采旅竹本無行
雀驚疑欲曙蟬噪似含涼
何言金殿側亟奉瑤池觴

帝京篇

唐太宗

秦川雄帝宅函谷壯皇居
綺殿千尋起離宮百雉連
餘連豐遙接漢飛閣迴凌虛
雲日隱城闕風煙出綺疏

早春桂林殿應制

唐上官儀

步輦出披香清歌臨太液
曉樹流鶯滿春隄芳艸積
風色翻露文雪華上空碧
花蝶來未已山光暖將夕

侍宴莎冊宮應制得情字

唐許敬宗

三星希曙景萬騎翊天行
葆羽翻風隊騰吹掩山楹
暖日晨光淺飛煙旦彩輕
塞寒桃變色冰斷箭流聲
漸奏長安道神臯動睿情

五言律

早春桂林殿應制

唐陳叔達

金鋪照春色玉律動年華
朱樓雲似蓋丹桂雪如花
水岸銜階轉風條出柳斜
輕輿臨太液湛露酌流霞

奉和儀鸞殿早秋應制

唐許敬宗

睿想追嘉豫臨軒御早秋斜暉麗粉壁清吹肅朱樓高
殿凝陰滿雕窻艷曲流小臣參廣宴大造諒難酬

銀潢宮侍宴應制得枝字

唐魏元忠

別殿秋雲上離宮夏景移寒風生玉樹涼氣下瑤池澗
花仍吐葉巖木尚抽枝願奉南山壽千秋長若斯

甘露殿侍宴應制

唐李嶠

月宇臨丹地雲窻網碧紗御園陳桂醖天酒酌搗花水

向浮橋直城連禁苑斜承恩恣歡賞歸路滿煙霞

和周記室從駕曉發合璧宮

李嶠

濯龍春苑曙翠鳳曉旗舒野色開煙後山光淡月餘風
長笳響咽川迴騎行疎珠履陪仙駕金聲振屬車

麟趾殿侍宴應制

唐
宋之問

北闕層城峻西宮複道懸乘輿歷萬戶置酒望三川花
柳含丹日山河入綺筵欲知陪賞處空外有飛煙

宮中行樂詞

唐
李白

水綠南薰殿花紅北闕樓鶯歌聞太液鳳吹繞瀛洲素
女鳴珠珮天人弄綵毬今朝風日好宜入未央遊

樂成殿

明
馬汝驥

金隄迴北拱寶殿樂西成春急奔湍上梁危架石行池
龍蟠九島苑鳥下層城帝豫因民事長揚媿頌聲

五言排律

九成宮秋初應詔

唐
劉禕之

帝圃疏金闕仙臺駐玉鑿野分鳴鶯岫路接寶鷄壇林

樹千霜積山宮四序寒蟬急知秋早鶯疎覺夏闌怡神
紫氣外凝睇白雲端舜海詞波發徒驚遊聖難

春晚侍宴麗正殿探得開字

唐張說

聖政惟稽古賓門引上才坊因購書立殿為集賢開髭
彥星辰下仙章日月迴字如龍負出韻是鳳銜來庭柳
餘春駐宮櫻早夏催喜承芸閣宴幸奉柏梁杯

奉和聖製暇日與兄弟同遊興慶宮作應制

張說

漢武橫汾日周王宴鎬年何如造區夏復此睦親賢
鳳新成閣飛龍舊躍泉棣華歌尚在桐葉戲仍前禁籞
氛埃隔平臺景物連聖慈良有裕王道固無偏問俗兆
人阜觀風五教宣獻圖開益地張樂奏鈞天侍酌衢尊
滿詢芻諫鼓懸永言形友愛萬國共周旋

奉和幸上陽宮侍宴應制

唐宗楚客

紫庭金鳳闕丹禁玉雞川似立蓬瀛上疑遊崑閬前
鳥將歌合轉花共錦爭鮮湛露飛堯酒薰風入舜絃
水光

搖落日樹色帶晴煙向夕迴
瑤輦佳氣滿巖泉

七言律

奉和春日幸望春宮應制

唐 沈佺期

芳郊綠野散春晴
複道離宮煙霧生
楊柳千條花欲綻
葡萄百丈蔓初縈
林香酒氣元相入
鳥嘯歌聲各自成
定是風光牽宿醉
來晨復得幸昆明

奉和春日幸望春宮應制

唐 鄭 愔

晨蹕凌高轉翠旌
春樓望遠背朱城
忽排花上遊天苑

却坐雲邊看帝京
百草香心初冒蝶
千林嫩葉始藏鶯
幸同微藿傾陽早
願比盤根應候榮

奉和春日幸望春宮應制

唐蘇頲

東望望春春可憐
更逢晴日柳含煙
宮中下見南山盡
城上平臨北斗懸
細草偏承迴輦處
飛花故落舞觴前
宸遊對此歡無極
鳥弄歌聲雜管絃

奉和春日幸望春宮應制

唐張說

別館芳菲上苑東
飛花淡蕩舞筵紅
城臨渭水天河近

闕對南山雨露通，繞殿流鶯凡幾樹。
當軒亂蝶許多叢，春園既醉心和樂。
共識皇恩造化同。

奉和春日幸望春宮應制

唐崔湜

淡蕩春光滿曉空，逍遙御輦入離宮。
山河眺望雲天外，臺榭參差煙霧中。
庭際花飛錦繡合，枝間鳥語管絃同。
即此歡娛齊鎬宴，惟應率舞樂薰風。

奉和聖製從蓬萊向興慶閣道中畱春雨中春

望之作

唐李愷

別館春還淑氣催
三宮路轉鳳凰臺
雲飛北闕輕陰散
雨歇南山積翠來
御柳遙隨天仗發
林花不待曉風開
已知聖澤深無限
更喜年芳入睿才

勅借岐王九成宮避暑應教

唐

王維

帝子遠辭丹鳳闕
天書遙借翠微宮
隔窓雲霧生衣上
卷幔山泉入鏡中
林下水聲喧語笑
巖間樹色隱房櫳
仙家未必能勝此
何事吹簫向碧空

和賈舍人早朝大明宮

王維

絳幘雞人報曉籌尚衣方進翠雲裘九天闔闔開宮殿
萬國衣冠拜冕旒日色纔臨仙掌動香煙欲傍袞龍浮
朝罷須裁五色詔珮聲歸到鳳池頭

奉和聖製從蓬萊向興慶閣道中畱春雨中春

望之作

王維

渭水自縈秦塞曲黃山舊遶漢宮斜鑿輿迴出千門柳
閣道迴看上苑花雲裏帝城雙鳳闕雨中春樹萬人家
為乘陽氣行時令不是宸遊玩物華

早朝大明宮呈兩省僚友

唐 賈至

銀燭朝天紫陌長
禁城春色曉蒼蒼
千條弱柳垂青瑣
百轉流鶯繞建章
劍珮聲隨玉墀步
衣冠身惹御爐香
共沐恩波鳳池上
朝朝染翰侍君王

和賈舍人早朝大明宮

唐 岑參

雞鳴紫陌曙光寒
鶯囀皇州春色闌
金闕曉鐘開萬戶
玉階仙仗擁千官
花迎劍珮星初落
柳拂旌旗露未乾
獨有鳳凰池上客
陽春一曲和皆難

和賈舍人早朝大明宮

唐杜甫

五夜漏聲催曉箭，九重春色醉仙桃。
旌旗日暖龍蛇動，宮殿風微燕雀高。
朝罷香煙携滿袖，詩成珠玉在揮毫。
欲知世掌絲綸美，池上於今有鳳毛。

紫宸殿退朝口號

杜甫

戶外昭容紫袖垂，雙瞻御座引朝儀。
香飄合殿春風轉，花覆千官淑景移。
晝漏稀聞高閣報，天顏有喜近臣知。
宮中每出歸東省，會送夔龍集鳳池。

宣政殿退朝晚出左掖

杜甫

天門日射黃金榜，春殿晴熏赤羽旗。
宮草霏霏承委珮，爐煙細細駐遊絲。
雲近蓬萊常五色，雪殘鳩鵲亦多時。
侍臣緩步歸青瑣，退食從容出每遲。

和李員外扈駕幸溫泉宮

唐錢起

未央月曉度疎鐘，鳳輦時巡出九重。
雪霽山門迎瑞日，雲開水殿候飛龍。
輕寒不入宮中樹，佳氣常浮仗外峰。
遙羨枚舉扈仙躡，偏承霄漢渥恩濃。

九成宮

唐
李商隱

十二層城閨苑西
平時避暑拂虹霓
雲隨夏后雙龍尾
風逐周王八駿蹄
吳岳曉光連翠巘
甘泉晚景上丹梯
荔枝盧橘沾恩幸
鸞鵲天書濕紫泥

興慶宮朝退次韻索伯長見貽是日上加尊號
禮成告謝集即東出奉祠齋宮

元
虞集

翠蓋重重寶扇斜
從官穿柳散慈鴉
過宮路遠紆天步

上壽杯深閣雨花玉貫兩虹通象緯衣成五綵練雲霞
奉祠東出蓬萊道春水鳧鷖踏漢槎

興聖殿進史

元 黃清老

瑤編初進侍明光日麗龍池晝刻長堤柳染成春水色
宮花併入御爐香金壺灑露層階滑玉盃分水廣殿涼
矇矓似知天意喜鳳笙新奏五雲章

大明殿早朝

元 歐陽元

扶搖萬里上青霄鳳闕龍池步步瑤駝背負琛金絡索

象身備駕玉逍遙
衣冠俯伏傳呼嶽
千羽低徊看舞韶
湖海布衣瞻盛事
他時田野夢天朝

六言絕句

宮中三臺詞

唐王 建

池北池南草綠殿
前殿後花紅天子
千秋萬歲未央明
月清風

七言絕句

宮詞

唐王 建

金殿當頭紫閣重
仙人掌上玉芙蓉
太平天子朝元日
五色雲車駕六龍

其二

羅衫葉葉繡重重
金鳳銀鷺各一叢
每遍舞頭分兩句
太平萬歲字當中

其三

未明開著九重關
金畫黃龍五色幡
直至銀臺排仗合
聖人三殿冊西番

其四

龍煙日暖紫瞳瞳
宣政門當玉仗風
五刻閣前卿相出
下簾聲在半天中

其五

宮花不共外花同
正月長先一半紅
供御櫻桃看守別
直無鴉鵲到園中

其六

延英引對碧衣郎
江硯宣毫各別牀
天子下簾親考試

宮人手裏過茶湯

其七

集賢殿裏圖書滿
點勘頭邊御印同
真跡進來依字數
別枚鎖在玉函中

宮詞

唐
顧况

禁柳煙中聞曉鳥
風吹玉漏盡銅壺
內官先向蓬萊殿
金合開香瀉御爐

朝元引

唐
陳陶

玉殿雲開露冕旒
下方珠翠壓鰲頭
天雞唱罷南山曙
春色先歸十二樓

其二

寶祚河宮一向清
龜魚天篆益分明
侍臣誰獻登封艸
五岳齊呼萬歲聲

早赴北宮

金
鄭攄

蒼龍雙闕鬱層雲
湖水鱗鱗柳色新
絕似江行看春曉
不知身是趁朝人

詠洪禧殿

元

周伯琦

鏤花香案錯琳琅
金甕葡萄大白浮
羣玉諸山環御榻
瑤池只在殿西頭

詠水晶殿

周伯琦

冰華雪翼眩西東
玉座生寒八面風
巧思曾經脩月手
通明原在五雲中

宮詞

周伯琦

苑路東西草色遙
闌干曲曲似飛橋
水晶殿外檐鈴響

疑是鑾輿早散朝

詠香殿

周伯琦

鷓斑百和作堅材
翥鳳翔龍四壁開
寶地曉張香積界
始知天子是如來

灤京雜詠

元楊允孚

曙色蒼茫閭闔開
相君有奏入蓬萊
須臾雲擁千官出
又帶天邊好雨來

其二

麗日初明瑞氣開
千官錫宴集蓬萊
黃門控馬天街立
丞相替花御苑回

宮詞

明 黃省曾

金鋪玉戶月流輝
寶座瑤臺映紫衣
聖主觀書居大善
三更龍輦未言歸

禁直

明 唐 敏

武樓高迥接迴廊
繡妥盤龍護御牀
得侍至尊論治道
祥風微裊水沈香

御定佩文齋詠物詩選卷一百十一

欽定四庫全書

御定佩文齋詠物詩選卷一百十二

門闕類

五言古

詠雙闕

陳江總

象闕連馳道
天宇照方疏
刻鳳棲清漢
圖龍入紫虛
屢逢膏露灑
幾遇祥煙初
競言百尺麗
寧方萬丈餘

賦得待詔金馬門

陳何胥

漢家一統軌濟濟萬國朝飛纓拂曉霧輕輦逐晨颺槐
衢映綠紱日彩麗金貂此時參待詔誰復想漁樵

五言律

詠門

唐

李嶠

奕奕彤闈下煌煌紫禁隈阿房萬戶列閭闔九重開疏
廣遺榮去于公待駟來詎知金馬側方朔有竒才

徽安門曉望

宋

歐陽脩

都門收宿霧佳氣鬱蔥蔥曉日寒川上青山白露中樓

臺萬瓦合車馬九衢通恨乏登高賦徒知京邑雄

大明門春望

明 張元凱

太和盈宇宙奕奕徧光華美麗都人綺芳菲輦道沙紫
騶銜禁草黃鳥卧宮花一望千重殿常生五色霞

五言排律

賦得蕃臣戀魏闕

唐 蔣防

剖竹隨皇命分憂鎮大蕃恩波懷魏闕獻納望天閭政
奉南風順心依北極尊夢魂通玉陛動息寄朱軒直以

蒸黎念思陳政化源如何子牟意今古道斯存

謁見日將至雙闕

唐闕名

曉色臨雙闕微臣禮位陪遠驚龍鳳覩誰識冕旒開謁
藹千年盛顛顛萬國來天文標日月時令布雲雷迴出
黃金殿全分白玉臺雕蟲竟何取瞻戀不知迴

七言律

闕下待傳點呈諸同舍

唐劉禹錫

禁漏晨鐘聲欲歇旌旗組綬影相交殿舍佳氣當龍首

閣倚晴天見鳳巢
山色葱蘢丹檻外
霞光泛灩翠松梢
多慚再入金門籍
不敢為文學解嘲

和宋學士晚出麗正門

元 甘立

暮光霞彩炫金題
絳闕高居雉堞低
上相樓臺連御苑
中郎車騎過沙堤
阜雕孤掖凌雲翮
紫燕雙翻踏雪蹄
回首上林涼月夜
蕊珠多是鳳鸞栖

長安門西道苑牆雨後經眺作

明 湯珍

紫宮黃屋邃森沈
馳道周廬肅羽林
樹裏啼鶯清禁切
雨餘流水御溝深
松篁並落鍾山翠
雲霧常依漢殿陰
此日謳歌歡在鑄
草茅何以嗣華音

七言絕句

出左掖門口號

元王暉

花映巖廊近紫宸
宮官行酒過三巡
共携滿袖天香出
散作都城十日春

望闕口號

明沈夢麟

閭闔排雲玉殿開
千官鵷鷺早朝回
不知誰獻王褒頌
得奉君王萬壽杯

夏日出文明門

明
薛瑄

文明門外柳陰陰
百轉黃鸝送好音
行過御溝回望處
鳳皇樓閣五雲深

御定佩文齋詠物詩選卷一百十二

欽定四庫全書

御定佩文齋詠物詩選卷一百十三

省掖類

五言律

晚出左掖

唐
杜甫

晝刻傳呼淺，春旗簇仗齊。
退朝花底散，歸院柳邊迷。
樓雪融城濕，宮雲去殿低。
避人焚諫草，騎馬欲雞棲。

春宿左省

杜
甫

花隱掖垣暮啾啾
棲鳥過星臨萬戶
動月傍九霄多不
寢聽金鑰因風想
玉珂明朝有封事
數問夜如何

省中即事

唐岑參

華省謬為郎蹉跎鬢已蒼
到來恒襍被隨例且含香
竹影遮窓暗花陰拂簾涼
君王新賜筆草奏向明光

和范秘書省中作

唐喻坦之

清省宜寒夜仙才稱獨吟
鐘來宮轉漏月過閣移陰
鶴聲燈前靜芸臺幄外深
想知因此興暫動憶山心

五言排律

酬蘇員外味道夏晚寓直省中見贈

唐
沈佺期

並命登仙閣分曹直禮闈大官供宿膳侍史護朝衣
卷幔天河入開窓月露微小池殘暑退高樹早涼歸
冠劔無時釋軒車待漏飛明朝題漢柱三署有光輝

直中書省

唐
韋承慶

清切鳳凰池扶疎雞樹枝唯應集鸞鷲何為宿羈雌
大

道乾坤闢深恩雨露垂昆蚊既含養駑駘亦驅馳木偶
翻為用芝泥忽濫窺九思空自勉五字本無施徒喜逢
千載何階答二儀螢光向日盡蚊力負山疲禁宇庭除
闊閒宵鐘箭移暗花臨戶發殘月下簾敲白髮隨年改
丹心為主披命將時並泰言與行俱危寄謝登巢客堯
年復在斯

春日直門下省早朝

唐王維

騎省直明光雞鳴謁建章遙聞侍中珮暗識令君香玉

漏催銅史天書拜夕郎
旌旗映閭闔歌吹滿昭陽
官舍梅初紫宮門柳欲黃
願將遲日意同與聖恩長

省中書事

元
王士熙

玉京長夏裏畫省五雲邊
終日身無事清時職是仙
縹緲分馬乳銀葉薦龍涎
細草煙籠蜀垂楊雪妬綿
客懷天外鶴農事雨餘田
染翰迎歌扇揮金向酒船
鼇峰孤絕處閒坐似當年

七言律

見于給事暇日上直寄南省諸郎官詩因以戲

贈

唐

白居易

倚作天仙弄地仙
誇張一日抵千年
黃麻勅勝長生籙
白紵詞嫌內景篇
雲彩誤居青瑣地
風流合在紫薇天
東曹漸去西垣近
鶴駕無妨更著鞭

休澣日西掖謁所知因成長句

唐

溫庭筠

赤墀高閣自從容
玉女窓扉報曙鐘
日麗九門青瑣闥

雨晴雙闕翠微峰
毫端蕙露滋仙草
琴上薰風入禁松
荀令鳳池春晚晚
好將餘潤變魚龍

省中偶作

唐張喬


三轉郎曹自勉旃
莎階吟步想前賢
不如遜無佳句
若比馮唐是壯年
捧制名題黃紙尾
約僧心在白雲邊
乳毛松雪春來好
直夜清閒且學禪

雨中放朝出左掖

明文徵明

霏微芳潤浥霓旌
歷落彤墀散履聲
暝色浮煙迷左掖

碧雲將雨近西清
柳垂青瑣千絲重
水落銀橋萬玉鳴
霑灑不辭袍袖濕
天街塵淨馬蹄輕



御定佩文齋詠物詩選卷一百十三

欽定四庫全書

集部

御定佩文齋詠物詩選卷百十四至百十八

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣王瓚

謄錄監生_臣史映綵

欽定四庫全書

御定佩文齋詠物詩選卷一百十四

館閣類

五言古

賦得謁帝承明廬

陳江總

霧開仁壽殿雲繞承明廬
輪停紺幃引馬度紅塵餘香
貂拜蔽袞花綬拂玄除謁帝
升清漢何殊入紫虛

五言律

冬夜寓直麟閣

唐
宋之問

直事披三省重關祕七門
廣庭憐雪淨深屋喜爐溫
月幌花虛馥風窓竹暗喧
東山白雲意茲夕寄琴樽

春夜寓直鳳閣懷羣公

唐
魏知古

拜門傳漏晚寓省索居時
昔重安仁賦今稱伯玉詩
鴛池滿不溢雞樹久逾滋
夙夜懷山甫清風詠所思

奉和人日清暉閣宴羣臣遇雪應制

唐
宗楚客

窈窕神仙府參差雲漢間九重中禁啟七日早春還太
液天為水蓬萊雪作山今朝上林樹無處不堪攀

七言律

題集賢閣

唐

劉禹錫

鳳池西畔圖書府玉樹玲瓏景氣閒長聽餘風送天樂
時登高閣望人寰青山雲繞闌干外紫殿香來步武間
曾是先賢翔集地每看壁記一慚顏

和劉郎中學士題集賢閣

唐

白居易

朱閣青山高庫齊與君才子作詩題傍聞大內笙歌近
下視諸司屋舍低萬卷圖書天祿上一條風景月華西
欲知丞相優賢意百步新廊不踏泥

憶夜直金鑾殿承旨

唐

李紳

月當銀漢玉繩低深聽簫韶碧落齊門壓紫垣高綺樹
閣連青瑣近丹梯墨宣外渥催飛詔草布新恩促換題
明日獨歸花路遠可憐人世隔雲泥

雨後月中玉堂閒坐

唐

韓偓

銀臺直北金鑾外暑雨初晴皓月中惟對松篁聽刻漏
更無塵土翳虛空綠香熨齒冰盤果清冷侵肌水殿風
坐久忽聞鈴索動玉堂西畔響丁東

陪王庶子遊後湖涵虛閣

宋 徐鉉

懸圃清虛乍過秋看山尋水上茲樓輕鷗的的飛難沒
紅葉紛紛晚更稠風卷微雲分遠岫浪搖晴日照中洲
躋攀况有承華客如在南皮奉勝遊

留題微之廨中清暉閣

宋 王安石

故人名字在瀛洲邂逅低回向此畱鷗鳥一雙隨坐嘯
荷花十丈對冥搜水涵樽俎清如洗山染衣巾翠欲流
宣室應疑鬼神事知君能復幾來游

寓直玉堂拜賜御酒

宋

范成大

歸鴉陸續墮宮槐簾幙參差晚不開小雨遂將秋色至
長風時送市聲來近瞻北斗璿璣次猶夢西山碧翠堆
慚媿君恩來甲夜殿頭宣勸紫金杯

新館內直

明

曾棨

華館深沈直禁闌彩霓丹碧煥暈飛上林萬樹連西掖
北極諸星拱太微繞硯龍香裁詔罷隔簾鶯語退朝歸
應知幾度青綾夜月轉金莖露滿衣

翰林齋宿

明文徵明

春星爛熳燭微垣獨擁青綾向夜闌宮漏隔花銀箭永
蓮燈垂燼玉堂寒坐聆宵柝霜圍屋想見郊禋月滿壇
鈴索無風塵土遠始知仙署逼金鑿

七言絕句

金鑿坡上南望

唐鄭畋

玉晨鐘韻上清虛畫戟祥煙拱帝居極眼向南無限地
綠煙深處認中書

玉堂讀卷雜賦次韻

元虞集

千花覆檻柳垂絲畫刻傳呼淑景遲聖主自觀新進策
侍臣簪筆立多時

與趙子期趨閣

虞集

日出風生太液波畫橋千尺彩船過橋頭柳色深如許

應是偏承雨露多

詔直內閣即事

明 胡儼

清曉朝回秘閣中
坐看宮樹露華濃
綠窻朱戶圖書滿
人在蓬萊第一峰

其二

浩蕩東風雨散絲
暗移春色上花枝
雲陰半捲龍樓晚
正是詞臣退直時

御定佩文齋詠物詩選卷一百十四

欽定四庫全書

御定佩文齋詠物詩選卷一百十五

院類

五言古

宴韋司戶山亭院

唐
高適

人幽想靈山意愜憐遠水習靜務為適所居還復爾汲
流漲華池開酌宴君子苔徑試窺踐石屏可攀倚入門
見中峰携手如萬里橫琴了無事垂釣應有以高館何

沈沈颯然涼風起

五言律

奉和幸上官昭容院

唐 鄭 愔

地軸樓居遠天台
闕路賒何如遊帝宅
即此對仙家
座拂金壺電池搖玉酒
霞無云秦漢隔別訪武陵花

其二

槎流天上轉茅宇
禁中開河鵲填橋至
山熊避檻來庭
花米菜蓐巖石步
莓苔願奉輿圖
秦長開錦翰裁

辱張常侍題集賢院詩因以繼和

唐白居易

天祿閣門開甘泉侍從回圖書皆帝籍僚友盡仙才騎
省通中披龍樓隔上台猶憐病宮相詩寄洛陽來

重脩府西水亭院

白居易

因下疏為沼隨高築作臺龍門分水入金谷取花栽遶
岸行初匝憑軒立未迴園西有池位畱與後人開

南谿書院

唐楊發

茅屋往來久山深不置門草生垂井口花發接籬根
院將雛鳥攀蘿抱子猿曾逢異人說風景似桃源

五言排律

集賢書院成送張說上集賢學士賜宴得珍字

唐
明 皇

廣學開書院崇儒引席珍集賢招袞職論道命台臣
禮樂沿今古文章革舊新獻酬樽俎列賓主位班陳節變
雲初夏時移氣尚春所希光史冊千載仰茲辰

奉和聖製送張說上集賢院學士賜宴賦得昇

字

唐
裴 濯

問道圖書盛尊儒禮教興石渠因學廣金殿為賢昇日
月恩光照風雲寵命膺謀謨言可範舟楫事斯憑燕喜
明時洽光輝湛露凝大哉堯作主天下頌歌稱

奉和聖製送張說上集賢院學士賜宴賦得風

字

唐
褚 琬

講習延東觀趨陪盛北宮惟師恢帝則敷教協天工宣

室思常異金華禮更崇洞門清永日華綬接徽風楚降
堯厨翠楸看舜酒紅文思光萬宇高議待升中

奉和聖製送張說上集賢院學士賜宴賦得華

字

唐韋述

脩文中禁啟改字令名加台座徵人傑書坊應國華賦
詩開廣宴賜酒酌流霞雲散明金闕池開照玉沙掖垣
畱宿烏溫樹落餘花謬此天光及銜恩醉日斜

晚秋集賢院即事寄徐薛二侍郎

唐
常
袞

穆穆上清居沈沈中秘書金鋪深內殿石甃淨寒渠花
樹臺斜倚宮煙閣半虛縹囊披錦繡翠軸卷瓊琚墨潤
冰文繭香銷蠹字魚翻黃桐葉老吐白桂花初舊德雙
遊處聯芳十載餘北朝榮庾薛西漢盛嚴徐侍講親華
宸徵詩步綺疎綴簾金翡翠賜硯玉蟾蜍移秩東南遠
離懷歲月除承明期重入江海意何如

七言律

院中晚晴懷西閣茅舍

唐 杜甫

幕府秋風日夜清
淡雲疎雨過高城
葉心朱實堪時落
堦面青苔先自生
復有樓臺銜暮景
不勞鐘鼓報新晴
浣花谿裏花饒笑
肯信吾兼吏隱名

田將軍書院

唐 賈島

滿庭花木半新栽
石自平湖遠岸來
筍迸鄰家還長竹
地經山雨幾層苔
井當深夜泉微上
閣入高秋戶盡開
行背曲江誰到此
琴書鎖著未朝回

夏日題尋真觀李寬中秀才書院

唐
呂溫

閉院開軒笑語闌江山併入一壺寬
微風但覺杉香滿烈日方知竹氣寒
披卷最宜生白室吟詩好就步虛壇
願君此地攻文字如鍊仙家九轉丹

寄題華嚴韋秀才院

唐
許渾

三面樓臺百丈峰西巖高枕樹重重
晴攀翠竹題詩滑秋摘黃花釀酒濃
山殿日斜喧鳥雀石潭波動戲魚龍

今來故國遙相憶月照千山半夜鐘

貢院憶繼學治書

元 馬祖常

棘闈粉署隔重牆校藝分官屬正郎五夜風簾燒蠟燭
九天冰樹劑龍香周旋接武尚書履供帳畱茵御史牀
臚唱閤門春色曙侍臣應奏慶雲章

次韻王師魯侍制史院題壁

元 周伯琦

大安御閣勢蒼亭華闕中天壯上京虹繞金堤晴浪細
龍蟠粉堞翠崗平衆星拱北乾坤大萬國朝元日月明

分署玉堂清似水
簫韶時聽鳳凰聲

春居玉山院

明
木公

玉嶽峻增映雪堂
年年有約賞春光
飛紅舞翠鞦韆院
擊鼓鳴鉦蹴鞠場
遲日醉聽羣鳥啁
暖風時送百花香
好山好地堪為樂
莫厭尊前累盞觴

五言絕句

書院

宋
趙抃

雨久藏書蠹風高老屋斜
鄰居盡金碧一一梵王家

七言絕句

春日書院

明魯鐸

門巷春苔隔路蹊
小桃開滿磬池西
枕書眠著無人喚
花裏東風百舌啼

御定佩文齋詠物詩選卷一百十五